

Vicente Tromp:

ATROBE REY DI DANDE DI ARUBA

Betico y su grupo "MIHOR GRUPO TIPICO"

Mas o menos 3500 hende a presencia e concurso di dande 1977 den cual a participa 15 cantante cu 14 grupo. E miembronan di jurado, Carlos Croes, Chido Quilotte, Josef Maduro, Chinto Werleman, Chinto Croes y Presidente di Jurado Ito Tromp tabata tin un tarea hopi dificil e biaha aki pa elegi e mihornan pa e concurso tipico y pa e concurso di dande.

Cuater ora largo e publico a goza di e presentacionnan ariba esenario y na final a resulta cu Betico y su grupo cu e cantante Tommy Croes a conquista e trofeo pa mihor piesa tipico, cual tabata un composicion di Etty Toppenberg "Nos Isla". Na segundo lugar a termina Los Campesinos cu a interpreta "Genio Alegre" di Julian Sprock, y na tercer puesto cu 142 punto a termina Grupo Folklorico Juvenil di Piedra Plat cu e interpretacion di nan Tumba Alegre.

Asina cu Vicente Tromp a presenta cu su grupo y a interpreta su dande, por a specula cu e lo a bira ganador di e concurso, locial a pasa tambe pa di dos aña consecutivo. Mas cerca di Vicente den votacion tabata Fanny Ras cu a termina cu 230 punto acompaña pa Folklorico Nacional. Fanny tin awor dos promer puesto y dos segundo puesto den concursionan di dande. Los Campesinos cu nan cantante Pascual Kely a conquista e tercer puesto. E premio pa cantante mas popular a ser obsequia pa prensa di Aruba. Maestro di ceremonia Juby Naar, a entrega e trofeo aki na e cantante Tintin Marin kende unanimamente a ser eligi pa e miembronan di prensa presente como e cantante mas popular.

Gobierno di Aruba a obsequia e wisselbeker pa e ganador di dande, mientras cu Vicente a ricibi tambe un trofeo obsequia pa Movimiento Electoral di Pueblo y pa Casa Brion. E trofeonan aki a ser entrega pa Diputado Nel Oduber.

E di cuarto concurso di dande a ser transmiti directamente pa Radio Antilliana y Voz di Aruba, mientras cu FM canal 90 stereo, Eddy Tromp y Radio Kelkboom a haci grabacionnan. E promotor cu a reviva dande na Aruba, e joven fotografo di prensa, Harry Croes por mira back na otro evento exitoso y cu dande ta back na Aruba pa keda.